

et ideo aeternitas et nunc aeternitatis non differunt re, sed ratione tantum».

In QQ. DD. De ver. q. 27, a. 1, ad 8. Haec leguntur: « Omne quod est in genere substantiae, est compositum reali compositione, eo quod id quod est in praedicatione substantiae, est in suo esse subsistentis, et oportet quod esse suum sit aliud quam ipsum; alias non posset differre secundum esse ab illis, cum quibus convenit in ratione suae quidditatis, quod requiritur in omnibus quae sunt directe in praedicatione».

Satis refutata manet ipsis S. Thomae verbis sententia eorum qui nimis confidenter affirmarunt S. Doctorem numquam realis distinctionis meminisse inter essentiam et esse in rebus creatis: verum ad hanc rationem concludendam non erit inutile iterum transferre verba Card. Pallavicinii (loc. cit.): « Omnis difficultas quae fit contra distinctionem essentiae ab existentia oritur ex eo quod homines assueri per sensus tractare, et numerare tantum individua subsistentia, aegre concipiunt aliquid ita esse ut quo, quin simul sit ut quod; propter quam ipsam rationem veteres philosophi ante Aristotelem, et multi ex recentioribus negant distinctionem accidentium in eodem supposito, et cuncta componunt ex atomis incompositis!! »

QUAESTIO II.

*De natura compositionis ex essentia et esse,
et de eius componentibus.*

CONTINUATIO RERUM. Cum proprium intellectus nostri sit procedere pederentim et gradatim in inquisitione veritatis, et a facilitioribus progredi ad abstrusiora, et magis abscondita, de qualibet propria questione primum investigare solet, an res sit, et per definitiones et explicaciones nominum quae viam parant ad definitionem perfectam rei suo quodam itinere ad cognoscendas rerum quidditates et essentias accedit. Quare postquam a nobis demonstratum est, ens distribui in potentiam et actum, ideoque esse compositum ex essentia et esse, inquirendum venit quenaam sit natura et ratio istius compositionis. Quod ut a nobis perficiatur, primo ostendemus, compositionem ex essentia et existentia esse compositionem realis potentiae et actus in ea recepti; deinde eam comparabimus cum compositione ex materia et forma; demum de extremis istius compositionis, nempe de esse et de essentia singillatim disseremus.

ARTICULUS I.

COMPOSITIO ENTIS IN QUANTUM EST ENS CONFERTUR
CUM COMPOSITIONE ENTIS MATERIALIS.

QUAESTIO ADUMBRATUR. Cuius compositio essentiae et esse sit prima ratio omnium reliquarum compositionum, quae in creaturis inveniuntur, et quaes intellectus nostro exhibet *reale* fundamentum ad diversas intentiones efformandas, liquet controversiam hanc circa prima scientiarum principia versari. Quare eius natura diligenter a nobis perverstiganda est, ut possimus adversariorum oppugnationibus occurrere, quae ex pravo huius doctrinae intellectu at plurimum originem ducunt. Nonnulli quippe realem distinctionem inter essentiam et existentiam impugnant, supponunt quaeconque esse de reali illa distinctione, quae intercedit inter rem et rem, seu inter duo entia subsistentia, ideoque criminantur cum Scotistis, in hypothesi realis distinctionis admittendos esse duos terminos totales actionis divinae, quae creaturam ex nihilo producit; quo nihil dici potest obtusius.

Quaestio ergo est, an creatura, idest ens creatum sit compositum ex natura et esse quae sufficiunt unicum ens concretum ex reali potentia et actu, vel sit aliquis simplicissimus actus. Hinc cum osores realis distinctionis inter essentiam et esse ita argumentantur, ut concludant essentiam realem existere extra causas, illud sufficiunt quod nemo sanus inficiabitur; sed probare deberent, omnem realitatem esse suam propriam existentiam, et non posse existere per actum ab ipsa distinctum, quo formaliter ponitur extra causas. Licit ergo ex iam disputatis liqueat compositionem ex essentia et existentia esse compositionem realis potentiae et actus; nihilominus non erit abs re directe doctrinam tanti momenti confirmare, et cavillationibus in materia tam subtili via praecludere. Quoniam vero in substantiis corporatis praeter communem entis creti compositionem ex essentia et esse, reperitur peculiaris et propria compositio ex materia et forma, ne geminae compositiones perperam permisceantur, comparationem inter utramque instituemus, et quid convenient, quid differant, expendemus.

PROPOSITIO I.

*In rebus creatis esse comparatur ad essentiam ut actus ad potentiam
in qua recipitur et contrahitur, ideoque compositio ex essentia et esse est
compositio realis potentiae et actus (1).*

Prob. prop. Arg. x^{ma} Ubi cumque inveniuntur duo, quorum unum est complementum alterius, proportio unius ad alterum est sicut

(1) S. THOM. *Contra gent. lib. II, cap. LIII;* cf. FERRARIENSEM.

proprio potentiae ad actum. Atqui in substantiis creatis inveniuntur duo, quorum unum est complementum alterius, nimirum essentia quae completer per existentiam. Ergo essentia in creaturis comparatur ad existentiam, ut potentia ad actum. *Maior* ex eo pater quod omne quod completer, non completer nisi per actum, cum compleri idem sit ac perfici, nempe esse actu. *Minor* vero exinde concluditur, quod in substantiis creatis duo reperiuntur, nempe ipsa substantia et esse eius, quod, ut probatum est superius, non est ipsa substantia. Atqui esse est complementum substantiae existentis; nam omne ens est actu per hoc quod esse habet. Ergo in substantiis creatis reperiuntur duo, quorum unum alterum completer.

Arg. 2.^{um} Esse inest substantiis creatis, quia illud participant a primo agente. Atqui quod inest alicui ab agente, est actus eius, cum agens proprium sit facere aliquid actu. Ergo esse est actus substantiae, quae ad ipsum comparatur ut subiectum. Ut propositione maior rite intelligatur, notandum nos minime dicere: Quod est in aliquo ab agente, est actus eius. Hoc quippe falsum est, cum etiam subiectum a potentia reali et materia prima sit ab agente, et nihilominus non sunt actus; verum aliud est esse ab agente, aliud inesse ab agente, uti ponitur in argumento; inesse enim proprium est adveniens posterius, saltē ordine generationis, sicut sensus est: Omne quod alicui convenit ab agente per modum sibi advenientis, est actus et perfectio eius.

PROPOSITIO II.

Compositio ex essentia et esse, quae circuit omnem substantiam creatam, non est confundenda cum compositione ex materia et forma quae propria est substantiae corporalis: licet enim haec duae compositiones in quibusdam convenient; differunt tamen in pluribus. (1)

Nota. Quod substantiae corporales coagmententur ex materia prima et forma substantiali supponitur hic, et probabitur in Philosophia naturali: ad intelligentiam tamen propositionis animadvertisimus, in substantiis materialibus inveniri quatuor realiter distincta; nimirum materia, forma, essentia ex illis composita, et existentia. Quare hī his substantiis reperiuntur duae compositiones pertinentes ad genus substantiae: prima est ex materia et forma; secunda ex essentia et existentia. Cum haec duae compositiones convenient in quibusdam; discrepant vero in pluribus, uti enuntiavimus in propositione, probabimus propositum per partes, enumerando et explanando primum rationes convenientiae, et postmodum rationes discrepaniae.

Prob. 1.^a pars. Principio quidem haec duae compositiones in duobus potissimum convenient, nimirum 1) quod utraque constat ex

potentia et actu, nam sicut esse completer et determinat essentiam ad hoc, ut formaliter existat extra causas; sic forma substantialis determinat et completer materiam ad hoc, ut sit in determinata specie naturae corporalis; 2) quod utriusque compositionis extrema sunt in eodem genere: in homine enim tum materia et forma, tum essentia et existentia sunt in genere substantiae et specie humana, quod quomodo intelligendum sit, accurate disputabatur a nobis in sequenti articulo.

Prob. 2.^a pars. Precipua discrimina inter utramque compositionem sic summarum recensentur a S. Thoma. 1) *Materia* non est ipsa substantia rei, sed pars substantiae. 2) *Esse* non est actus proprius materiae, sed totius substantiae, seu compositi ex materia et forma; eius enim actus est esse de quo possumus dicere quod sit. 3) *Forma* non est ipsum esse, sed ad ipsum comparatur, ut albedo ad album esse. 4) *Ad ipsam formam* comparatur esse, ut actus. Per hoc enim forma in compositis dicitur principium essendi, quia est complementum substantiae, cuius actus est ipsum esse.

Ut haec S. Thomas doctrina uberior evolvatur, dicimus cum Caetano has duas compositions sequentibus separari ac dividit:

1.^o Extrema primae compositionis sunt partes substantiae et non substantia proprie loquendo, ideoque in genere substantiae non sunt formaliter, sed reductive, et consequenter praedicationem substantiae in obliquo dumtaxat recipiunt. Ex adverso neutrū extremorum secundae compositionis est pars substantiae, cum unum, nempe essentia sit substantia qua est in linea recta praedicamentali; alterum sit extra, vel inelius supra substantiam, quia ipsam transcendent.

2.^o Extremum quod in prima compositione se habet ut potentia, est ens mere potentiale, neque est id quod est, neque id quod fit, cum fieri sit via ad esse. Contra extremum quod se habet ut potentia in posteriori compositione, nempe essentia non est ens mere potentiale; sed ens in aliqua specie completem quidditative; propterea non est pars eius quod fit, sed id quod fit et est, cum omne fieri terminetur ad compositum et sit via ad esse.

3.^o Extremum quod in prima compositione se habet ut actus, non est ultima rei actualitas, sed aliud ulteriore actum causat ad quem etiam comparatur ut subiectum. Ex opposito actus secundae compositionis est ultima rei actualitas, cum in Socrate post existentiam nihil substantiae ulterius adveniat, et ita ad nullum alium actum comparetur ut potentia vel subiectum (1).

4.^o Denum haec duae compositiones differunt quoad proprias passiones; nam ex prima compositione sequuntur quantitas, accidentia sensibilita et transmutatio; ex secunda vero non sequitur nec gene-

(1) *Comparationem* fuse explicat CAIET. *De ente et essentia*, cap. V, q. 9 medio.

ratio nec corruptio, sed tantum recipere et recipi, perficere et perfici. Haec quippe consequuntur actum et potentiam, illa materiam et formam. Rem ita dilucide explicat S. Thomas: « Compositio actus et potentiae est in plus, quam compositio formae et materiae, unde forma et materia dividunt substantiam materialem: potentia autem et actus dividunt ens commune: et propter hoc quaecumque quidem consequuntur potentiam et actum in quantum huiusmodi, sunt communia substantiae materialibus et immaterialibus creatis, sicut recipere et recipi, perficere et perfici. Quaecumque autem sunt propria materiae et formae in quantum huiusmodi, sicut generari et corrumperi et alia huiusmodi, haec sunt propria substantiarum materialium, et nullo modo convenientia substantiae immaterialibus creatis » (1).

ARTICULUS II.

AN EXISTENTIA IN CREATURIS SIT ACCIDENTS
VEL REDUCATUR AD SUBSTANTIAM.

QUAESTIO DETERMINATUR. Cum esse actualis existentiae sit realiter distinctum a substantia creata, et ad ipsam comparetur ut actus ad potentiam, merito dubitari potest, an esse creaturarum sit substantia unitum et superadditum ut accidentis, vel ut pars substancialis. Si enim esse in creaturis praedicaret proprie aliud accidentis, tunc ex substantia et esse fieret unum per accidentem, et consequenter esse adderet substantiae extraneam quandam naturam, quod est perspicue absurdum. Contra si additur substantiae ut eius pars substancialis, tunc ex substantia et esse videretur fieri unum per se, quod non est minus absurdum, et secum pugnans; nam in hypothesi ex substantia et esse deberet fieri ratio una, ideoque existentia esset pars quidditativa substantiae creatae, quae deberet ponи in eius definitione, cum definitio declarat rei quidditatem. Liceret ex iis quae a nobis hucusque disputata sunt de natura compositionis ex essentia et esse, haec dubitatio rite solvi valeat; nihilominus ad vitandas aequivocationes quae in hac re ex ipsa loquendi ratione oriri possent, non erit supervacaneum directe questionem satis subtilem et absconditam endare. Esse quippe in creaturis quandam similitudinem gerit cum accidente, ideoque a Doctoribus interdum dicitur praedicatum accidentale; secus ac in Deo in quo esse identificatur cum eius quidditate, ideoque est praedicatum stricto sensu essentiale. Verum maximo in errore versaretur, qui exinde concluderet existentiam in creaturis proprio sensu dicendam esse reale quoddam accidentis.

(1) *Contra gent. lib. II. cap. LIV.*

Nodum sic paucis dissolvit Angelicus: « Esse non dicitur accidentis, quod est in genere accidentis, si loquamur de esse substantiae (est enim actus essentiae), sed per quamdam similitudinem, quia non est pars essentiae, sicut nec accidens » (1). Et revertit esse existentiae est id quo substantia habet ultimam actualitatem: impossible autem est substantiam habere ab accidente hanc ultimam actualitatem. Quocirca cum divisio entis prima et transcendens omne genus sit in potentiam et actum, ita ut in quolibet praedicamento detur compositio potentiae et actus, tunc concludimus actum ultimum substantiae, nempe eius existentiam pertinere reductive ad genus substantiae, et ex adverso esse accidentis pertinere reductive ad genus accidentis. Siquidem ad genera directe pertinent quidditates; reductive vero pertinent ea quae respectu substantiae vel accidentium se habent ut principia vel complementa, quae ad genus reducuntur, vel ut partes constitutivae eius quod formaliter est in praedicamento, vel ut complementum et ultima perfectio, qua res iam constituta ponitur extra causas. Cum ergo essentia proprie ponatur in praedicamento; nam « essentia significat aliquid commune omnibus naturis per quas diversa entia in diversis generibus et in diversis speciebus collocantur » (2), secundum diversum modum quo essentia recipit esse; consequenter existentia non potest dici neque substantia praedicamentalis, neque accidentis categoricum: propterea sapienter monet Philosophus, ens non esse genus; cum esse a quo ens denominatur, non sit pars constitutiva generis, sed complementum generis constituti.

PROPOSITIO.

Existentia substantiae creatae non est accidentis ipsi superadditum, neque principium substantiae constitutivum, sed dicenda est substantia iam constitutae ultima perfectio et actualitas, qua substantia proprie dicitur ens. Quare substantia praedicamentalis et esse non faciunt neque unum per se neque unum per accidentem.

Prob. 1^a pars, nempe existentiam non esse accidentis reale substantiae superadditum, intelligendo nomine realis accidentis rem cuius quidditati competit esse in alio tamquam in subiecto. Hac praemissa animadversione, sic argumentum concludi potest. De ratione realis accidentis est: 1) ut perficiat proprium subiectum perfectione extranea a natura subiecti; 2) ut praeponatur subiectum suum actu esse, ideoque actualitas per prius inventatur in subiecto, quam in forma accidentiali; 3) ut proprium subiectum accidentis possit intelligi esse actu, quin aliquid intelligatur de inhaerentia illius formae accidentialis. Atqui

(1) *QQ. DD. De Pot. q. 5, a. 4 ad 3.*

(2) *S. THOM. opusc. De ente et essentia, cap. I.*

nihil horum attribui potest existentiae sine conceptum pugna. Ergo existentia non est accidentis reale et categoricum additum substantiae. Major in promptu est quod omnes suas partes; nam albedo e. g. quae hominem perficit, ipsi afferit perfectionem extraneam a natura hominis; alia quippe est ratio et definitio hominis, alia ratio et definitio albi. Neque minus evidens est secunda conditio, quia accidentis esse est inesse subiecto, et subiectum propriè dicitur aliquid actu existens, ita ut actualitas per prius competat subiecto et per posterius formae accidentali (1); nam inesse seu esse in alio supponit esse in se, ideoque subiectum per esse actuatum, ut patet intelligenti vocabula. Demum probe intelligere possumus hominem existere, quin aliquid intelligentias de suis potentiis operativis, quae sunt accidentia ab ipso inseparabilia. Neque dubitatio admitti potest circa propositionem minorem; nam cum esse sit ipsa rei actualitas, non perfectum extraneum perfectione, quia entis non est extraneum nisi nihilum. Quare licet esse non denotet in creaturis essentiam rei, quia ab ipsa realiter distinguitur; nihilominus quodammodo dici potest praedicatum essentiale, qua rem non pertrahit ad aliud genus ut accidentis, sed in sua propria natura perficit. Similiter esse substantiale quod est primum esse rei, non praesupponit substantiam in actu, cum ipsam actu faciat; et consequenter sine substantiali actu essendi substantia nequit intelligi existere actu.

Prob. 2^a pars, nempe existentiam non esse principium constitutivum substantiae praedicamentalis. Etenim substantia praedicamentalis est quidditas rei, cui competit esse in se, et cuius definitio et intellectus praescindit ab esse vel non esse, ut tradit Philosophus (*1 Post. Analyt.*). Atqui nulla definitio praescindere potest a principiis intrinsecis constituentibus rei substantiam et naturam. Ergo esse quod est actus existentiae non potest dici principium ipsius constitutivum, et ideo in creaturis esse non est praedicatum proprie et stricte existentiae, quia non significat ipsum rei quidditatem. Cum enim ens transcedens quod dividitur in potentiam et actum, nempe in existentiam et esse, contrahatur ad decem diversa genera, id quod formaliter collocatur in genere est rei existentia seu quidditas, quae de suis inferioribus univoce praedicatur, et non esse quod de pluribus diversis non potest univoce praedicari. Quocirca sicut existentia vagatur per omnes reales rerum categorias, cum in qualibet reperiatur, quanvis diversimode; sic existentia comes existentiae ad quamlibet categoriam saltem reductive pertinere dicenda est. Existentia ergo accidentis est reductive accidentis; et existentia substantiae est substantia reductive. Verum enim existentia substantiae non reducitur ad substantiam, ut forma substantialis reducitur ad genus substantiae, et simul cum materia coagmentat naturam

(1) S. THOM. I p. q. 77, a. 6.

quae formaliter est in genere; forma enim et materia dividunt substantiam materialem quae est in genere, ut potentia et actus; sed ita reducitur ad substantiam, ut illam iam constitutam compleat et formaliter ponat extra causas, et ipsam transcendat, cum esse non solum sit actus substantiae sed etiam accidentis: ideoque existentia et esse dividunt ens in potentia et actus (1), et cum ens vagetur per decem categorias, sic existentia et existentia per easdem vagantur.

Prob. 3^a pars, nempe ex existentia et esse non fieri unum per se neque unum per accidens. Haec pars rite concluditur ex praecedentibus; nam *unum per se* resultat ex componentibus, quae sunt potentia et actus in eodem genere, et *unum per accidens* resultat ex componentibus quae sunt in diverso genere, et ideo unum per accidens dicitur coadunare diversa praedicamenta, ut homo albus: hinc ex existentia et esse non fit unum per se, neque unum per accidens. Verum sic potest res ulterius declarari. *Unum per se* dicitur quod est indivisum in se et divisum a quolibet alio per hoc praecise quod ipsum est primo et simpliciter. Hinc ea componentia dicuntur facere unum per se, quae convenient ad componendum ens in ratione eius quod ipsum est primo et simpliciter, nempe quae convenient ad constitutendum ens in suo esse substantiali, quod est *esse simpliciter*. *Unum per accidens* dicitur illud cuius unitas non consistit in ipsa ratione eius quod est primo et simpliciter, sed in aliquo illi rationi extraneo. Duplex unitas accidentialis, altera qua formae accidentiales diversorum generum convenient cum substantiali et inter se in uno eodemque subiecto: altera qua plura subiecta convenient in una aliquam formam accidentalem, ut plures lapides in domum vel in acervum.

Ex existentia et esse non fieri aliquid tertium unum per se; nam ut ex duobus fiat unum per se, requiruntur tria: 1) ut utrumque concurrat ut pars ad constituendam eandem existentiam illius tertii, seu id quod est primo et simpliciter illud tertium: non enim ex duobus intellegitur fieri unum per se, nisi utrumque constitutuam intrinsece ut pars id quod est ens primo et simpliciter; 2) oportet ut alterum e duobus sit actus, alterum pura potentia; secus alterum componens accedit ut actus ad aliquid iam actuatum priori actu, et sic ex duobus non fieri unum per se, idest per id quod est ens primo et simpliciter; sed fieri unum per accidens, quatenus posterior actus convenient in uno subiecto cum priori actu qui solus est substantialis; 3) oportet ut componens quod respectu alterius est actus, possit comparari ad aliquid aliud ut potentia, nimirum ad ipsum esse, seu ad formam totius, prout totum est, ita ut respectu illius formae partes componentes se habeant quodammodo ut materia. Porro nulla ex his conditionibus, que omnes

(1) Materia et forma dividunt substantiam materialem, potentia autem et actus dividunt ens commune. *Contra gent.* lib. II, cap. LIV.

sunt in materia et forma, inveniuntur in compositione ex essentia et esse, ideoque non sit unum per se. Neque fit unum per accidentem, cum non aggregentur res diversorum generum.

Ex hoc nequit inferri essentiam et esse non componi per se. Aliud quippe est duo componi per se, seu ex propria utrisque ratione; aliud componi per se ad faciendum aliquod tertium *unum per se*. Essentia quippe et esse dicunt intrinsece ordinem unius ad alterum tamquam potentiam ad proprium actum; sed compotuntur non ad faciendum aliquod tertium; sed ad ponendum extra causas illud idem, quod est essentia, seu res cui competit esse. Sic essentia hominis compositum esse non ad faciendum tertium aliam rem, quae sit diversa substantialiter ab hoc homine, neque quae ab eodem sit diversa per accidentem, sed ad ponendum extra causas id ipsum, quod est hic homo.

SOLVUNTUR DIFFICULTATES.

Oppon. 1.^o Quod non est de intellectu essentiae seu substantiae est accidentis eius. Atqui esse non est de intellectu substantiae. Ergo est accidentis.

Resp. *Dist. mai.* Quod non est de intellectu substantiae, et est aliquid in praedicamento collocatum, est accidentis, *Conc.* Si est aliquid praedicamenta transcendens, *Subdist.* Est accidentis proprie, *Neg.* Per quamdam similitudinem, *Conc.*

Explico. Cum id quod in praedicamento collocatur sit essentia quae praedicatur univoce de suis inferioribus, si de realitate praedicalmenti quaestio institutur, qualibet res aut est in praedicamento substantiae, aut accidentis, cum non detur medium, et in hoc sensu vere dicitur: quod non est substantia, est accidentis. Sed si agatur de realitate qua praedicamenta transcendit, ea iure dici potest neque substantia neque accidentis sensu categorico, sed transcendens tum substantiam tum accidentis. Sic existentia proprii non est neque substantia neque accidentis categoricum, quia est actus entis quod non potest esse genus; nihilominus potest quodammodo reduci ut ultimum complementum tum ad genus substantiae, si est actus essentiae substantialis, tum ad genus accidentis, si est actus quidditatis accidentialis; quare non immerito esse creaturam cum non sit pars substantiae, a quibusdam nuncupatur accidentis transcendentis.

Oppon. 2.^o Esse in creaturis inest essentiae, cum sit forma inhaerens et non subsistens. Atqui quod inest alteri, est accidentis. Ergo.

Resp. *Dist. mai.* Esse in creaturis inest essentiae tamquam forma, qua essentia actu exsistit, et ponitur extra causas, *Conc.* Tamquam forma rei existenti superveniens, *Neg.* *Contradist. min.* Quod inest alteri, tamquam forma superveniens rei iam existenti, est accidentis, *Conc.* Quod inest alteri, tamquam forma qua res actu exsistit, *Neg.*

Explico. Non omne quod alteri inest potest dici accidentis, ut patet in forma substantiali, quae inest materiae ut actus, et nihilominus non est accidentis, sed substantia incompleta. Ad hoc ergo ut aliqua forma dicatur accidentis reale, debet supervenire aliqui essentiae iam existenti, nempe in suo primo esse constitutae. Quocirca forma accidentalis necessario erit quidditas diversae et extraneae naturae a quidditate substantiae (1).

Oppon. 3.^o Ex duorum iunctione vel resultat unum per se, vel unum per accidentem. Atqui ex compositione essentiae et esse non resultat unum per se. Ergo resultat unum per accidentem.

Resp. *Dist. mai.* Si haec duo copulantur sub aliquo esse communis quod sit vel esse primum vel esse secundum, *Conc.* Si unio et compositio fit inter subiectum essendi, et ipsum esse primum, vel esse secundum, *Neg.*

Explico. Cum unum et ens convertantur, sicut ens dicitur ab esse, ita unum dicitur ab esse indiviso; est enim unum ens indivisum. Porro in altero composite ex essentia et esse licet formalis ratio entis et unius dimanet ab esse, et ab esse indiviso; tamen id quod denominatur ens et unum, est subiectum essendi, id est essentia. Hinc si essentia seu essendi subiectum est forma simplex et subsistens, statim seipsa est ens et unum, ut loquitur Philosophus; sed si essendi subiectum est compositum, tunc ex compositione potest resultare tertium aliquid, quod dicitur unum per se, vel unum per accidentem. Si enim partes sunt eiusmodi, ut una sit mera potentia in genere substantiae, quae dicitur materia prima; altera autem sit proprius actus illius potentiae nempe forma substantialis; tunc partes illae simul unitae efficiunt primum subiectum essendi seu substantiam completam, et consequenter ex materia et forma substantiali resultat unum per se et simpliciter. Si autem partes qua copulantur non efficiunt primum essendi subiectum, quia una unitur alteri iam existenti in actu, ut contingit cum forma aliqua accidentalis unitur essentiae substantiali; tunc partes istae, nempe substantia et accidentis non possunt uniri sub primo esse, sed sub esse secundo, et sic ex substantia et accidente resultat ens per accidentem et secundum quid, quia unio iam praesupponit ens per se et simpliciter, et ideo resultat unum per accidentem et secundum quid. Quare esse substantiale est ultima actualitas, quae ponit extra causas unum per se; esse accidentale est ultima actualitas, quae ponit extra causas unum per accidentem, non autem constituit rationem eius quod dicitur unum per se, vel unum per accidentem.

(1) S. THOM. opusc. *De ente et essentia*, cap. VII.

ARTICULUS III.

DE MULTIPLICI ENTIUM GRADU, SEU DE DIVERSIS RERUM ESSENTIIS.

QUAESTIO DETERMINATUR. Ens, essentia, et esse ita se habent ad invicem, ut ens sit id quod habet esse, seu compositum ex essentia et esse; essentia sit principium, quo res habet esse, seu id secundum quod res dicitur esse et quo res denominatur ens; et esse sit actus seu ultima rei actualitas, quae res ponitur extra causas, et a qua etiam et primario accipit nomen entis seu denominatur ens, et ideo ens dicitur tum ab essentia, tum ab esse. «Sic se habent, ait Aquinas, haec tria ad invicem, ens, essentia, et esse, sicut vivens, vita, et vivere. Vita enim est principium, quo vivens vivit; et essentia est principium quo ens est; nisi quod vita et vivere significant actu, vita in abstracto, vivere vero in concreto, sicut cursus et currere; unde non est vita sine vivere: essentia tamen non semper constituit esse »(1). Cum autem in rebus creatis, esse quod est forma inherenter et non subsistens dividatur, contrahatur et individuatur per subiectum seu per essentiam in qua recipitur, et a qua fluit ut aliquid ens sit *hoc aliud* et distinctum a qualibet alio, cumque res collocatae in generibus et speciebus non distinguantur inter se eo quod habent esse, sed eo quod habent tale esse receptum in determinata natura tamquam in proprio perfectibili, secundum quod diversae rerum species distinguuntur et constituant admirabilem universi pulchritudinem (2); consequens est entia omnia revocari posse ad quosdam gradus plus minus perfectos secundum quod in ipsis diversimode inveniuntur essentia quae ordinem dicit ad esse perfectiori vel imperfectori modo. Quapropter meritissimo Angelico Praeceptor postquam in primo capite opusculi *De ente et essentia* explanaverit rationem et conceptum fum entis tum essentiae, in reliquis capitibus usque ad finem investigat et evolvit, quo pacto essentia inveniatur in diversis rebus, quae dicuntur entia, et secundum diversos modos quo essentia inveniatur in ipsis, diversos assignat entium gradus. Elegante hanc S. Thomae doctrinam fidelissime, et clariori qui fieri potest modo in re tanti momenti exponere conabimur.

Essentia substantialis. In hac re duplex institui potest comparatio, vel nempe substantiarum inter se, vel substantiae cum accidente: ideoque declarandus est conceptus tum essentiae substantialis, tum essentiae accidentalis, eo quod essentia ut forma metaphysica secundum quam subiectum comparatur ad existentiam, primo dividitur in substantialiem et accidentalem. Essentia ergo seu quidditas substantialis

(1) Opusc. *De natura generis*, cap. I.(2) *De Pol.* q. 7, a. 2, ad 5.

in ente est illa entitatis ratio seu forma secundum quam subiectum intelligitur ut ens primo et simpliciter, nempe ut aliquid cui secundum se competit existere independenter a qualibet alia priori forma ipsum determinante: vel paulo secus, essentia substantialis est talis entitatis ratio, qua sublata, non intelligitur amplius subiectum habens determinatam realitatem, et consequenter habens secundum se rationem entis simpliciter, nempe rei cui secundum se competit existere, quia nihil existit nisi determinatum. Hinc quidditas substantialis anonomastice dicitur rei essentia, sicut ac quidditas accidentalis; quia nomen essentiae dicitur primo ab esse simpliciter: unde cum existere simpliciter habeatur per quidditatem substantialem, haec proprio nomine et absolute dicta est essentia, prae aliis quidditatibus, quibus accipitur et participatur essa non simpliciter, sed secundum quid.

Quidditas accidentalis. Forma seu quidditas accidentalis est entitatis ratio, secundum quam subiectum comparatur ad esse non ut ens primo et simpliciter, sed ut ens secundum quid; nimisrum est ratio secundum quam aliqui rei competit actu esse quantam, quallem, relatum ad aliud, et similia, quae omnia praesupponunt primum esse rei, quod est simpliciter esse. Quocirca in rerum natura non datur quidditas accidentalis, nisi praesupponatur essentia aliqua substantialis secundum quam subiectum essendi comparatur ad existentiam, ut cui competit per se ponit in rerum natura ut *hoc aliud* et non aliud: neque ens concretum, quod dicitur ut subiectum habens quidditatem accidentalem, e. g. album habens albedinem, intelligi potest existere extra causas, nisi quatenus intelligatur advenire enti concreto, quod est subiectum habens essentiam substantialiem. Exinde intelligitur illud a S. Thoma saepissime usurpatum et apud Scholasticos perulgatum, nempe: quidquid supervenit alicui rei in suo primo esse constituta, accidentaliter advenit, et ipsi afferit esse quoddam secundum.

Substantia et accidentis. Ens ab essentia concrete acceptum trahitur in substantiam et accidentem; et licet substantia quae est supremum genus presse definiri nequeat, nihilominus eius genuina quasi definitio, monente S. Thoma, in eo est, ut dicatur: *Res cuiusquiditatis debet esse non in alio.* Ex adverso accidentem definitur: *Res cuiusquiditatis competit esse in alio tamquam in subiecto* (1). Sic tum in substantia, tum in accidente salutare ratio generis, quae de omnibus inferioribus praedicator *univoco*, et denotat quidditatem rerum, quae differunt per esse; sic etiam determinari potest, quomodo essentia secundum diversos perfectionis gradus reperiatur in substantia et in accidentibus, et praesertim quomodo in diversis substantiis inveniatur; ex quo multiplices differentes efflorescent entium gradus.

(1) *Contra gent.* lib. I, cap. XXV; 1 p. q. 3, 4, 5; *De Pol.* q. 7, a. 3 ad 4.

Substantiae et accidentis comparatio. Et primo quidem essentia est in substantiis proprie et per se; in accidentibus vero quodammodo et secundum quid. Etenim, ut brevi utamur Aquinatis argumento, sic ratio concludi potest. Unumquodque sicut est ens, sic habet essentiam. Iam vero substantia est ens simpliciter; accidentis est ens secundum quid. Ergo substantia habet essentiam simpliciter, accidentis vero secundum quid. Cum major in superioribus a nobis explanata fuerit, in praesenti satis erit sic suadere et declarare minorem. Illud est simpliciter ens, de quo ens absolute et simpliciter praedicatur, cum praedicari consequatur esse; et illud est ens secundum quid, de quo ens secundum quid et per posterius dicitur. Atqui de substantia ens dicitur simpliciter, de accidente vero secundum quid. Ergo. Et re vera cum ens dicatur ab actu essendi et significet id quod habet esse, unumquodque ita est ens, sicut recipit esse. Substantia autem est subiectum essendi independenter a qualibet alio subiecto, cum sit id cui debetur esse non in alio: accidentis contra recipit esse dependenter a substantia, cum sit id cui competit esse non in se, sed in alio, id est in substantia. Liquet ergo ens primo et absolute praedicari de substantia; per posterius et secundum quid de accidentibus. Institutum a nobis comparationem sic paucis perstringit Aquinas noster: «Quia ens absolute et primo dicitur de substantiis, et posterius secundum quid de accidentibus, inde est quod essentia proprie et vere est in substantiis, sed in accidentibus est quodammodo et secundum quid» (1).

Substantiae inter se comparantur. Cum ens absolute et vere dicatur de substantiis, secundum diversos perfectionis gradus quibus diversae substantiae sibi vindicant essentiam, divers efflorescentium gradus. Porro triplici potissimum ratione admodum diversa inventur in substantiis essentia; hinc triplex entium subsistentium perfectionis gradus.

Et primo quidem, ut a nobiliori incipiamus, est aliquod ens cuius essentia unum idemque est cum suo esse, ideoque dicitur et est ipsum esse per se subsistens et actus purissimus, nempe Deus: propero quod non defuerint philosophi, qui affirmaverunt, Deum non habere essentiam eo quod essentia in ipso non est essendi subiectum, sed suum ipsum esse per se subsistens. Quod in causa est cur Deus non possit esse in genere, cum omne quod est in genere habere debeat quidditatem praeferre esse suum; nam quidditas seu natura generis aut speciei non distinguitur secundum rationem naturae in illis quorum est genus vel species; sed esse est in diversis diversimode (2).

Secundo in substantiis creatis intellectualibus, quae sunt forme per se subsistentes, essentia inventur modo longe diverso: in ipsis quippe

(1) Opusc. *De ente et essentia*, cap. II.

(2) Opusc. *De ente et essentia*, cap. VI.

esse est aliud ab essentia ipsarum, tametsi essentia sit sine materia. Quare esse carum non est absolutum, sed receptum in quidditate, et consequenter limitatum ac finitum ad capacitatem naturae recipientis: natura e contra vel quidditas carum est absoluta et non recepta in aliqua materia. Cum autem in ipsis non sit nisi forma, quae in se recipi esse tamquam in proprio receptivo per se singulari, et subsistente, essentia in huiusmodi substantiis, licet sit potentia per ordinem ad esse; in ordine tamen quidditatis et naturae est actus irreceptus et per se subsistens, et in se complectens totam perfectionem illius ordinis in quo est actus: et ideo intelligentiae in libro *De causis* dicuntur finitae superius, et infinitae inferius; cum sint finitae quantum ad suum esse, quod recipiunt in subiecto seu natura determinata ad aliquam speciem seu gradum; non autem finiuntur inferius, quia carum forme non limitantur ad capacitatem aliquius materiae recipientis eas. Unde in ipsis non reperitur multitudine individuum in una specie, sed quodlibet individuum totam in se colligit suae speciei perfectionem. Licet ergo huiusmodi substantiae sint essentiae simplices; nihilominus quoniam in ipsis quidditas non est idem ac esse, sed essendi actus recipitur et coactur ad capacitatem quidditatis quam actuat et formaliter existere facit, ideo ordinabiles sunt in praedicamento, et in eis inventur genus, species, et differentia, quamvis earum differentiae nobis sint occultae.

Demum tertio modo essentia inventur in substantiis compositis ex materia et forma, in quibus tum esse est receptum et finitum, tum natura vel quidditas carum est recepta in materia signata; et ideo sunt finitae et superius et inferius, et in eis propter divisionem materiae signatae, possibilis est multiplicatio individuum in una specie (1). Essentia in huiusmodi substantiis non significat neque solam materiam neque solam formam; sed compositum ex utraque. Quod sic concludi potest. Illud in substantiis compositis designatur nomine essentiae, quod in se recipit essendi actum ad quem refertur, ut subiectum ad ultimam actualitatem. Atqui actus essendi non recipitur proprie neque in materia neque in forma, sed in composito ex utraque. Ergo in huiusmodi substantiis essentia significat compositum ex materia et forma (2).

Quod ut rite intelligatur prae oculis habendum est substantias dici compositas non quod earumdem esse sit compositum et multiplex, sed quod earum essentia seu essendi subiectum sit ex partibus concreta. Si enim esse essentiae compositae constaret ex partibus, recurrente sane foret ad aliam formam partes eius adunantem, et ita actum esset de unitate substanciali. Ergo si substantia nuncupatur composita;

(1) S. THOM. opusc. *De ente et essentia*, cap. V et VI.

(2) Opusc. *De ente et essentia*, cap. II.

id non significat ipsum actuari multiplici et composito *esse*; sed solum significat ipsam conflari ex partibus essentialibus, quae ad unitatem essendi evehuntur per *esse* quoddam simplex et unum; et sic diversae partes substantiales coagmentatae uno essendi actu, constituant ens et unum per se et simpliciter. Huius doctrinae apprime concinit Angelicus Doctor inquisiens: *Esse* neque participat aliquid ut eius ratio constitutatur ex multis, neque habet aliquid extraneum admixtum... et ideo ipsum esse non est compositum (1).

Substantiae compositae, quae visibilem pulcherrimamque mundi fabricam constituant, imperfectiorem, multoque magis limitatam sibi vindicant essentialiam, ideoque postremum occupant in entium gradibus locum. Cum autem obiectum proprium et directum humani intellectus sit quidditas substantiarum materialium absolute considerata, idest abstracta a principiis materialibus et individuabitibus, quae eam determinant ad esse huius vel illius singularis corporei, primum est intelligere quanti momenti sit accuratius investigare et rite determinare naturam et proprietates essentialias rerum visibilium. Sic enim scientia nostra quae directe circa ipsas versatur, in tuto colloquari poterit, et mature liberari tum a veterum, tum a recentiorum oppugnationibus, qui, relicta bene constituta Peripateticorum philosophia, vel concedunt in sensim Heracliti, Cratyl, Democriti, et Lockii, et docent, nos nihil absoluti, necessarii, et immutabilis cognoscere in rebus sensibilibus et corruptibiliibus, quae sunt in perpetuo fluxu; vel labuntur in idealism Platoni, et plurium recentiorum, qui Cartesio studentes, negant scientiam nostram versari circa reales essentias, quae subsistunt in singularibus visibilibus, quae a nobis tractantur sensibus. Primi scientiam omnem subvertunt, quae versatur circa necessaria; posteriores decernunt nos non cognoscere res, sed ideas rerum, et sic omnem valorem realem et obiectivum scientiae nostrae subtrahunt; quare tum primi tum secundi tandem aliquando in purum putumque ruunt scepticismum, uti luctuosa testatur veteris recentisque philosophiae historia. Quae cum ita habeant, non erit supervacaneum recentiorum philosophorum errores circa essentias rerum visibilium breviter recensere et refellere, veramque hac super re exponere et confirmare doctrinam.

ARTICULUS IV.

DE ESSENTIIS SUBSTANTIARUM COMPOSITARUM.

MULTIPLEX RECENTIORUM ERROR. Et primo nobis occurrat ex Sensistarum familia Lockius, cui adstipulatur eius discipulus Condillacius, qui doctrinam de rerum visibilium essentiis tum in se

(1) Opusc. in BOETIUM, *De hebdom.* lect. 2.

et ontologice, tum relate ad cognitionem nostram consideratis, radicitus subvertit. Lockius quippe docet, res omnes visibles et corporatas constitui et coalescere ex proprietatibus et diversis qualitatibus, quae iuxta ipsum componunt essentialiam rei *realē* quam cum rei existentia, et singularitate confundit (1). Praeter essentias reales tueretur anglus philosophus, dari essentias *nomināles*, quae ad rerum constitutionem nullo pacto spectant; sed sunt unice opus et pigmentum rationis humanae, quae res omnes singulares et existentes arbitratu suo ad quasdam revocat classes, quas communibus vocabulis designat. Quare notiones universales non sunt, nisi nomina, quibus nihil reale respondet extra intellectum; et sic revocat commentum Nominalium, qui conceptibus universalibus omnem obiectivum valorem substrahentes, scientiam ipsam, qua est de universalibus et necessariis e medio susulerunt. Nominalium errori concinens Lockius et veterum Sensistarum ignobilem renovans philosophandi rationem, profitetur, intellectum nostrum non cognoscere nisi essentias rerum nominales ab ipso fabricatas, quae a Scholasticis dictae fuerunt genera, et species: de realitate autem rerum iuxta Lockium intellectus nihil cognoscit, nisi sensibiles et externas proprietates, quas sensibus cernit; cum intellectu intrinseca rei constitutio seu proprietates intrinseca rem constituentes, quas medius britannus reales essentias vocat, sint omnino imperviae et prorsus ignota.

Quare integra Lockii hac de re doctrina sic summatim proponi potest. Res visibles coalescent ex variis proprietatibus, quae constituent intrinseca earum realē essentialiam. Intellectus noster applicando ad libitum eadem nomina pluribus rebus similibus quoad extrinseca accidentia, efformat essentias nominales; nempe genera et species, et has tantum cognoscit, cum penitus ignoret intrinseca et realia rerum constitutiva, nempe essentias reales. Hac doctrina innexus Lockius contendit, demonstrari haud posse materiam esse incapacem cogitationis. Giobertius Lockii sententiam ex parte amplexus est, et essentias nominales nuncupavit *rationalē*, fassusque est essentias reales non solum esse intellectui nostro ignotas, sed in se inintelligibiles seu inexcogitabiles (2).

Cartesiani. Circa rerum essentias multipliciter peccatum est a Cartesio, et a nonnullis Cartesianis. Cartesius quippe, cui plures adstipulati sunt, confundens rerum existentiam cum earundem essentialia et quiditate; et insuper decernens dependere a libera et indifferenti voluntate Dei, nulla praesupposita idea exemplari in intellectu divino, ut res potius hanc vel illam sortitae sint naturam seu essentiam, consequenter docuit, essentias rerum esse omnino contingentes et muta-

(1) Saggio sull'intelletto umano, lib. III, cap. III.

(2) Introd. lib. I, cap. VIII, not. 2.